

# OMUKUETU

No: 3.

Maart

1955.

## ONDJILA JOPAHALO LJA KALUNGA.

Pecimbo, ndika ljeidiliko tua uuvicilua moongerki detu nkene Jesus a popi mondjila je jokuhepekua. A tameke okulombuela aalongua je nkene e nokuja ku Jerusalem noku ka hepekua omahepeko ogendji nokudipagua (Mat. 16:21). Kalunga okue mu uucile ondjila ja tja ngaaka odigu. Kalunga okue mu uucile ondjila joshilja. Ngashi oshilja shi nokusa opo iilja iipe ji holoke, osho uo Kristus e nokusa opo tu mone omuenjo gualuh. Kalunga okue mu uucile ondjila tuu ndjoka o nolueta nomolu aantu ajehe. Ohoole ja Kalunga ji cike peni sho a gandja omuna gue Jesus Kristus!

Ihe Jesus a mono mondjila tuu ndjoka jopahalo lja Kalunga omamakelo. Sho kua li mombuga, a makelua kondiabili okuciga po ondjila ndjoka odigu nokuhogolola uujamba u uujuni mbuka nesimano ljauro. Ihe Jesus a sindana. Okua diginina shili ehala lja Kalunga. Mu Mat. 16:22-23 tatu fatululilua nkene Jesus a makelua ishevu. Ngashingeji a makelua komulongua gue muene omuhoolike, Petrus. „Shivalelue u ningue ngaaka.” Osho Petrus a ti, Jesus sho a fatululilua aalongua je ondjila je jopahalo lja Kalunga. Petrus a diladila shili uuanaua ua Jesus. Ndi shi a diladila uo uuanaua uevangeli. Ondjila joshilja inaji oopalala Messias, Omukuaniilua. Ihe ando Jesus a ninge Omukuaniilua omunene, ngoka te ke mu mangulula mondjoko jaaroma, ando evangeli li taandele mbala muujuni auhe. Ando Jesus a ninge omunankondo a tja ngaaka, ando iilonga ja Kalunga ji holoke naua apehepepe. Ando Jesus a ninge omusimanekua muujuni muka, ando aantu ojendji je mu itaale. Osho Petrus a diladila. Osho omuntu ta diladila. Ihe ondjila ndjoka ojopahalo ljomuntu.

Ondjila jopahalo lja Kalunga oji ili. Oje a hala oku tu hupica. Ando Jesus ina kuatua kaajuda, ando tse inatu mangululua. Ando Jesus ina sa, ando otse inatu mona omuenjo, ihe ando tua pangulilua meso omolu uulunde uetu. Ihe Jesus sho a hogolola ondjila joshilja, kokutja, ondjila jeso, okue tu longele omuenjo.

Otse aantu otu li po uo mokuhogolola pokati koondjila mbali. Ondjila jimue ojo ondjila jopahalo lja Kalunga nondjila onkua-uo ojo jopahalo ljomuntu. Ngele tua hala okuninga aalongua ja Jesus naamati je, tu didilikeni oohapu da Jesus: „Ngele ku na ngoka a hala okulandula ndje, oje ni idimbike je muene, ni itsike omushigakano gue, je na landule ndje.” Mondjila ndjoka itatu kongo uuanaua uetu jene, ihe uuanaua uoojakuetu, uuanaua uevangeli nuuanaua uoshilongo sha Kalunga. Uunene otse mbaka otu li moshilonga shOmua, moshilonga shevangeli, otua guana okuidiladila nokuikonakona ngele tu li mo mondjila lja jopahalo lja Kalunga. Mondjila ndjoka ajike otatu vulu okulongela Omua.

Okamati okashona ka tala nkene onjeka ja minikile no ja pupjaleke mondjugo. Ihe ka kumua sho ka dimbulula nkene onjeka ja ningi ofupi. Onjeka ja shonopala. Okamati ka ji ku jina no ke

## OHOOLE JOMUKULILI

Mulonga ngu omunene shili Tagu zi ku Golgata,  
Oguohole no guombili; Omo to ka jela nga.  
Osha longua, shono sha pua. oku Golgata.  
Uuva; uuva; Onzigona. nkene taji pandulua!

Hoole ndjo onenenene Jaa shi okutumbulua Jesus tatu mu hambelele, Shoka tse tua kulilua.

Osha longua...

'Munandjo ngoka ito vulu Okuja k'Omujapuki,

'Mpito jokuja megulu Ou ji na mOmukluli  
Osha longua...

Tal' oonkondo de da hulu, Oondjo sho a humbata;

Sheelo shokuja megulu Oje sho e egulula!  
Osha longua...

Mokukondja kuoje tala Ngu a sind' emutondadi!

Simaneka, hambelele Jesus ngu Omusindani!  
Osha longua...

Mel: "Suuri rakkauden meri".

mu pula: Omolua shike onjeka ja shonopala ngaaka? Ojina a ti: Oka nuandje, kehe ngoka a hala okuminikila monilema domuujuni mbuka nokupupjaleka mboka ju uuvite uatalala, e nokufupipala. - Ondjila jeifupipiko ojo ondjila jopahalo lja Kalunga Muujuni muka omu nombepo ja hala okuvundakanica oondjila doka mbali. Ombepe ndjoka ja hala ondjila jaakriste ji ninge ompu jo oopalele aantu ajehe. Ombepo ndjoka ja hala okudima po uudi-gu auhe uomondjila ndjoka jomushigakano. Inaji hala okuciga po omicigululuakalo dookuku doka di nondumbo noohapu d Kalunga. Mouambo muka omua holoka uo ombepo ja tja ngaaka. Tse atuhe otatu makelua kujo.

Oluindji tatu njengua okudimbulula omumakeli. Jesus a makelua komujapostoli Petrus, ngoka a koko uunene mokutseja Kristus nehala lja Kalunga. Omumakeli guetu a hala uo tu dimbulule nkene ta kongo uuanaua uetu auke. Oje ite tu indike okuja komambo, ite tu ciminik okuciga po egongalo ljetu. Ote tu zimine uo okulesha oohapu, ihe a hala tu vundakanice oohapu da Kalunga nomadita il gomuntu nokahalua ke.

Oojakuetu, tu tonateni, tu kondjiceni ombepo ndjoka jevundakano. Tu hogololeni ondjila ndjoka jomuenjo, ondjila jopahalo lja Kalunga, nando taji pula eidiiliko neididimiko. Kehe ngoka a hala okuhupicua, e nokukokola kehe esiku ongamba pokati kuujuni mbuka no koshilongo sha Kalunga.

Jalmari Marttunen

## OMEHO GA TAALELA JESUS

(Etsikilo)

Ku Jesus, ha momadiladilo getu omajuuki, ha momagalikano getu, ha moonkundacana detu dopambepo, ha momambo omauanaua hatu ga lesa, ha miigongi iijapuki, moka hatu ende mo, ha mUulalelo Uujapuki nokuli. Tu longiceni nuudiginini iilongico ajihe jesilohenda, ihe katu noku ji vundakanica nesilohenda ljoljene, nomeho getu ge nokutaalela onguka auike, ngo ta vulu oku ji pa oonkondo, oshoka oje oti iholola mujo.

Ku Jesus, ha mokukala kuetu mongerki no megumbo moka tu li mo, ha meshasho ljetu, ha meputudo tue li peua, ha mehepupululo ljeitaalo ljetu, ha momadiladilo gaantu, nkene taa diladila uujuuki uetu, na nkene tatu u diladila tse jene. Ojendji mboka ja li ja hunganeke medina lja Jesus, oje nokuuva, oje sho te ja lombuele esiku limue: „Kandi mu shi”, ihe oje ota ka hempulula montaneho jaHe no jaajengeli ongoka a li a taalele kuje, nomufupielela mokati kaambaka.

Ku Jesus, ha kaamuameme, ha kuambaka auuanaua no aahoolike nokuli. Mokulandula omuntu okupuka oku li popepi. Mokulandula Jesus itashi vuika okukana. Ngele tu nomuntu pokati ketu na Jesus, otashi vulika omuntu ta ka koka, na Jesus ta shonopala. Mbalambala Jesus katu mu uete ue, ngele katu nomuntu nguka, na ngele Jesus kee po, nena ajiha kaji po. Ihe ngele Jesus oku li pokati ketu nokuume kandje, nena ohoole jandje joku mu hoola kaji uukile naa naa kuje, ihe oja kola nokukolelela, kaji nuuhalu, no kaji pumbiua uunene, ihe oji nejakulo enene. Ojo taji jakulica ejambeko enene, ngele ji li miikaha ja Kalunga noje ngele a hala oku ji longica, nojo ngele kaji po nando, natango taji eta ejambeko. Oje nge a hala oku ji kandula po, opo e tu fale popepi nOkuume nguka auike, moka „eso nenge cmuenjo” kagu vulu oku tu joolola mo.

Ku Jesus, ha kaatondi je, nenge kaatondi jetu. Peha ljoku ja tonda, nenge ljoku ja tala, tatu vulu ngeji oku ja hoola noku ja sinda.

Ku Jesus, ha komaimbo ge li mondjila jetu. Shaa tuu tatu tameke oku ga tala, ogo otage tu halukica, tage tu tengukica, no tage tu jugu omukumo, oshoka katu uviteko omolua shike ge tu ada, na nkene ge nokusindua. Petrus a tameke okuningina shaa tuu a tameke okutaalela omakucikuci, ihe shaa tuu a taalele Jesus okue ende komeja a fa e enda kermanja. Oshilonga shetu ngele osha digupala, nomamakelo getu ngale oga nenepala, nena uunene taku pumbiua tu kale tatu taalele Jesus oje auike.

(Tadi tsikilua)



ELIKO OSHIPONGA.

Pomimvo dino dongashingeji, m'Ouambo omue ja omalunduluko nomahumokomeho ogendji. Otatu shi mono koombinga noombinga nokuli. Eeno, shino ota, shi tu njanjuda sho pue ja ehumokomeho lja tja ngeji; ihe opu na uo shoka osiwinaji she ja pamue nehumokomeho ndika m'Ouambo.

Mu Amerika, osho uo mu Europa nokuumbugantu ua Afrika, aantu oji ipjakidila niilonga ji ili no ji ili. Ihe opo utameke niinenelonga ja tja ngauo, oto pumbua sha oshindji, osho iimaliua (kapitaal). Kapu na ando ngoka e na iimaliua ojindji-jindji e te ji gandja ajihe, opo ji ka tamekice oshinenelonga, aaue, aantu oja tamake nomakuacacano. Otatu vulu ano okutja ehumokomeho ljaeuropa ljongashingeji olja tungua po, nolja kolekua komagongelo giimaliua (kapitaal). Oko tuu nkoka kua tungua uo oshitja (kapitalisme) (iikuakugongelua).

Shoshene oshe ja shili nelunduluko enene, ihe oshe etele uo oshiponga pecimbo oljo tuu ndjoka.

Pomacimbo ngano gongashingeji, opu na aantu ojendji mboka ja hala okuninga aajabantu, ihe ojendji otaa u ikongele pamikalo omiwinaji. Ihaa kala je na ediladilo ndjoka ljompumbue jimaliua, onke je na okuhehela iimaliua, noshilalakanenua osho tuu shoka: ja mne iimaliua ojindji. Elalakaneno ndika ljuujamba, olje etelele uo omadiladilo omape: Iinima jomuujuni mbuka, ojo ji na oshilonga, manga jopambepo niikuauo jilue, jaa na naua oshilonga, nenge jaa na nando oshilonga. Omadiladilondunge ngano, otatu ga icana ogo: omadiladilondunge giikuaujuni, moluaasho ohaga dila dila ouala shika shi uetike, noshimpuiju shi li po, osha mbjoka jopavi ouala.

Omadiladilo ga tja ngeji, oga halakanene uo m'Ouambo ajihe. Meputuko nomehumokomeho otatu mono mo uo shoka oshiuinaji. Tu taleni ando jimue jomiiuinaji.-

Aauambo ojendji otaa holele aatiligane, nge momizalo ngele mokuopaleka omafufu, (opo ga fe gomutiligane), elaka ljauo jene otaa li dini jo e taa kala ouala ja hala okupopja elaka ljomutiligane ndjoka je shi, osho nosho. Iinima ajihe mbika ojo eputuko a niua. Ihe shika osho edidiliko ljuuulika kutja omuntu egoja natango, onke ta kambadala okuiifeca a fe jalue. Aamati jamue ohaa zi k'Uushimba ja zala oofilipusa mbali, do e tadi mpinjuninua komapepe, nenge taa zala omakende jo inaaje ga pumbua, nenge omipena nomisipela odindjindji, eputuko a niua.

Otua njanjukua mol' ehumo. Otatu njanjukua uo ngele m'Ouambo tamu ja iimaliua ojindji taji zi palue. Omuntu ngele ota vulu okulanda okafalata (okacanguacangua) nenge okatempa, onaula, manga e ji pumbua. Ihe ngashingeji oshi li po sha fa euliko ljuujamba. Ano omuntu ita landa ehauto nenge etempa opo a kale te etele egumbo lje iiti, nenge e ete elunduluko mepja lje, okua fa e li

1. Ekandanga ndi li na muka no megulu uo, Jesus sho a hupica muenjo guandje mokusa.
2. Mevi tandi sile mo, ongondanda jilja mbjo, mevi taji holama sigo taji aanduka.
3. Okukala kuandje uo nako osho ku li po. Ngaj' inandi tila sha, ndjila nde ji longelua.
4. Oshishani ndi shi na muua mbu ua Kalunga; 'hambelelondjimbo ndi kali na mpo tali si.
5. Mbepo ngoj' Ondjapuki, aadimic' Omukulili! Kanjutulula ndje mo omu mbjo taji hulu po!

landa opo u ulike uunenentujamba ue.

Okukalamuenjo kua tja ngeji, otaku fala uo mboka itaa vulu okukonga iinima ja fa mbjoka, momahongololo; oshoka najo uo otaa tameke okuhehela shikeshike opo ja mone sha ja uape okulanda ngele okacanguacangua ngele oonguuo ombuana-ua, aantu ojendji ngashingeji oje li moon-unga pamukalo ngu. Nenge tu popje aagundjuka mbo ja hala okuhokana. Elalelolalakaneno ndika ljuujamba olja kuata aakadona ojendji naakuluntu jauo, onke omumati guomuuambo. ita vulu okuhokana shampa ouala a hala, oku na okulja oongunga sigo oongunga de mu likica koon- gonga mokukalamuenjo kue kuokomeho.

Oohapu dika otadi gejica aaleshi oje-ndji, unene mboka itaa vulu okumona oshiponga shoka, jo kaa uete ngele pe na oshiponga. Ihe otua gumu oshinima shika, opo tuu tu londode tse tu penduce oojaku- etu, Onaua uo ngele tatu shi kundacana, (shoka shika osho oshinenenima mevi ljetu, omokukalamuenjo taku ja. Ombimbeli otaji popi uo sha koshinima shoka: (Rom 13: 8), Inamu kala mu nongunga jomuntu, oongunga dukuholacana odo adike" Shino otashi tu ulukile uo mikalo omikulu daa- uambo. Ano ngele oua pumbua sha, inda u ka pule ku ngoka e na oshindji, hangun- ga, ongomagano. Nangoka e na sha, na kuace, oshoka otu na uo okudimbulukua kutja, oshiponga shuuujamba otashi tu fala uo moheli. Ha ngame ouala muene ngele nda kuatua kombepo ndjoka jiiikuavi, ihe otandi taandelica uo ombuto ndjika johole jiiikuavi moojakuetu.

Ndishi otu uvu nkene omutu a ji e ki idipage omolu'oongunga, hasho ashike sho- ka, Onke tu diladileni oshinima shika tse tu shi kundacanenani opo tu mone mo oshi- li. Pakukalacana niinima jomuujuni mbuka, natu kale pankalelo ndjoka tatu tulua komujapostoli gu'Omuaa: (ngoka e shi okuinekelua). Namboka haa endacana nuujuni mbuka, onga mboka kaa na sho taa likola mo, oshoka olupe luujuni mbu- ka otalu hulupo. Onda hala mu kale muua niimpuiju". Kor. ; 31)



mOmbalantu:

- Salomo Shooja a si 18. 1. 55.
- David Kodopo a si 30. 1. 55.
- Abner Shikongo a si 31. 1. 55.
- Klaudia Nestor a si 8. 2. 55.
- Sakaria Shivute a si 24. 2. 55.
- Immanuel Endjala a si 26. 2. 55.

kOniimuandi:

- Hilma Taapopi ja Petrus a si 6. 1. 55.
- Stefanus j' Angula a si 7. 1. 55.
- Rebeka ja Nenkavu a si 10. 1. 55.
- Marta Magano ja Simeon a si 13. 1. 55.
- Helena j' Iilonga a si 11. 1. 55.
- Naftali j' Elifas a si 17. 1. 55.
- Deivas j' Erastus Iikuti a si 3. 2. 55.
- Sevelen j' Erastus Iikuti a si 4. 2. 55.





# OSHIKOLOLO SHOMEGUMBO



## OKULONGA AANONA OSHILI.

Onda dimbulukua omumati gumue ngoka e ja ku ngame nokua ti: „Ombili, meme, shoka nde shi ku lombuele nena, kasha li oshili. Jajee ngame, unake tandi ilongo okupangela elaka ljangje! Ondi igilile okupopja iifundja pecimbo ljuunona uandje nokuli, noku ji eca taku njenge ndje sigo ngashingeji.

Omumati ngoka ndi mu uvitile olukeno. Omeho ge ga tonaticua nokuli kOmbepo Ondjapuki, ihe okua li e nokukondja olugodi oludigu a uape okueca ondjo je, oshoka okue ji igilile naji. Mokati ketu mu na ihe aagundjuka ojendji mboka je li molugodi tuu ndoka. Ojendji je eca nokuli okukondjica ondjigilile iifundja no jomakoto. Oja ningi aantu aafundja, nosho taa ka kala sigo keso ljauo. Omolua shike? Omolu ondjigilile ombuinaji je ji mono muunona nokuli.

Kape na aakuluntu mboka ja hala aana jauo ja ninge aantu aafundja. Ihe opua fa, pe naakuluntu mboka itaa putuda naua oluvalo luauo moshinima shika. Otaa longo aana jauo naua omikalo di ili no di ili omiuanaua ihe itaje ja longo naua, oshiponga shiifundja mpoka shi cike.

Omukulukadi oto ningi ngini, nge to dimbulula luotango, okamuoje ka popi iifundja nenge ka kuca sha shoka shaa shi shako? Oto jolo tuu nokudiladila, oko ka koko moondunge. Osho aantu ojendji taa ningi. Okanona take shi dimbulula no ta ka kuatua kediladilo, kutja, iifundja nomakoto ogo oshijolica shouala. Omunona a koko nokuli nge ta kuatua miifundja, aakuluntu haje mu geele nga. ihe mpoka omunona ta vulu okulimbililua omikalo daakuluntu je. „Naale nda jolua sho nda popi iifundja, nonena nda dengua. Omolua shike nda dengua nena?“ Osho omunona ta kanica einekelo ljokuinekela aakuluntu.

Onke ano aakuluntu je nokudimbulukua shika: Okanona okashona nokuli

ke nokugeelelua iifundja jako. Shika ita shi ti, tu noku ka denga nondjahi, aue. Ihe omunona e nokudidilika, oje a ningi sha shoka sha nikica aakuluntu je oluhodi olunene. Jina nenge he ku noku mu popica ji ikalela noku mu hokololela, nkene ngashingeji oje a kuatua kondjo ombuinaji ndjoka taji vulu oku mu etela oshiponga shomuenjo. Omunona e nokutsejicilua, kutja omakoto nuufuci niifundja Omuaa Jesus e ga ehamekelua, notaji lilica aajengeli aajapuki. - Ngele aanona taa popicua ngeji, ojendji jomujo taa mono oonkondo dokusinda omamakelo. Ihe ngele taa puka natango nokuguila momakoto, je nokupopicua isheue nokugeelua uo.

Ope noshiponga shimue tashi fala aanona ojendji miifundja. Osho uumbanda. Omunona ngoka e nokutila jina nenge he no nkondo, sigo ta kakama koshipala shauo, kee nomukumo guokuhokolola oshili,

ihe ta kambadala okuikuaca nokupopja iifundja. Shoka inashi opala. Nando omunona e nokutila aakuluntu je, uumbanda uunenene ouo oshinima oshiuinaji. Omunona e nokutseja, aakuluntu je je mu hocle nohoole ja kola, nomageelo gauo uo ga jeleka. Osho ku nomukumo guokupopja oshili, nando a jono oshinima sha sha nenge a ningi sha shi indikua.

Ihe tangotango omukuluntu kehe e nokudimbulukua, kutja, oje muene e nokugandja oshiholelua oshiuanaa moshinima shika. Nando u kumagide omunona nomakumagido ge cike peni, kage noshilonga sha sha ngele omunona te ku kuata ua popi iifundja nenge ua kotokele oojakueni. Naanona taa dimbulua nuupu ngele to ende moshili nenge aue. Omukulukadi gumue okua njenjetele omuana omolu iifundja e ji popi. Omunona e shi pu'akene nokua pula ihe: „Omunona e nokuguanica oomvula ngapi, manga iinaa ziminua okufundja?“ Omukulukadi sho kua kuminua epulo ndjo, omunona a tsikile a ti: „Ohela ndu uvu nkene ua lombuele omushiinda shetu sha shoka shaa shi oshili.“ Omukulukadi a tompua shili nokua li e nokuhe mpulula oje a li a puka naji.

Ehokololo ndika tali tu lombuele naua, nkene tu nokukala moshili ngele tua hala aanona naagundjuka jetu je ende moshili. Otu nokukotoka tuua kale mboka Omuaa Jesus te ja popi nokutja: „Ongoka ta hongolola kamue kuushona mbuka ui itaala ndje, she mu oopalele, ando a mangelua mocingo je emanja ljoshini e tu umbilua muule uefuta.“ Tatu vulu oku u hongolola noshiholelua shetu uo. Otu nokukala ano tua tonata.

Okulonga aanona oshili kaku shi oshinima oshipu, aue, oshidigu. Kalunga ne mu kuace, one aaputudi aauambo, moshilonga shika, epipi epe li ninge aantu jomoshili. Omuntu omufundja ta ji eui lja Kalunga ontuku. Ihe omuntu guomoshili Omuaa Jesus te mu popi ngeji: „Kehe tuu ngoka guomoshili, oje tu uvu eui ljangje.“





# OUNJUNI TAU TONGO SHIKE

## DIE UNIE VAN SUID-AFRIKA.

Oshongalele shoshuana (Die Parlement)

Oshongalele shoshuana osha ongalele efiku eti 21 Januarie okudja peengudafana dimue da kuma eemuenjo mu Kaapstad. Otashi tu uapalele ofje atushe unene oshitopolua shovakriste voshuana sketu, tu kale tu shi ko sha koshili ei nokuaashi tashi ka landula ngene edu letu li nokulelua na eshi tashi ningua moiongalele jedu letu, inashi kala nande shii komuñu umue. Novakriste nave shi hokue jo nohokue javo nai longe jo opo. Otava dulu jo okuninga oshinenenima nomailikaneno avo, shaashi ounongo ou tau endifa oshuana mondjila ja juka otava teelua pOmbada. Ndelene ovakuluñu vetu ove na oilonga idju paife. Onge ohatu teelua tu humbatele oshongalele shovapoñele-joiuana kefilongenda nokenangekonoupuna. Iomuene. Inava kamba oujelele mondjila omo ve nokuenda vo nava mone eeñgono ku Kalunga.

Oimaliva moluovadaleluamo vomu Afrika.

Oshongalele shovakriste aveshu mu Johannsburg osha tokola ngaha okupula Epangelo la Suid-Afrika oiponda eemiljuni 10 omulo keshe omolu okukalamuenjo kuovadaleluamo ku ningue naua.

Odula ja eta ehupifo linene,

Oluteni la hanga edu alishe.

Tai loko kanini tai tuaalele ngaho fijo oilemo tai njanjauka eti 26 na 27 Januarie. O uteni linene lidju moshitopolua shinene shOumbangala noshOushilo ua Kaapland, ouingininu noubuañu ua Vrystaat, ouingininu ua Transvaal, Natal noubangala ua Suidwes omo oluteni lua hula. Keembinga dimue inali hula natango, nande oshituime sha hovele nokuli.

Okudja moluteni eli lidju leemuñdi 10 oshilemo osha hanaukila mu Bloemfontein nosha eta epepelelo koudju uoluteni. Omapandavanda okua kungululua needila okua li tadi anjenua omolu odula ei ja tilashi ngaha.

Oshilemo eshi shidju unene osha uila moushilo ua Kaapland na eshi oshinene sha uila mu Matatiele-Cedarville. Olutenda olua kungululua. - Omikunda dopokati Matatiele na Impendhele mu Natal da mona odula inene neembulu da mona oshiponga. eedi neengobe oda tuaalelua komulonga. - Moubangala ua Kaapland omua lokua naua. Oluteni opeñele dimue.

Suid-Afrika otali kumuifa, omuzulu ta ti ku ava vopondje,

Ovashangi voifo vokoilongo okua li ve shi ohandi popi oshinima sheshoko ku Suid-Afrika. Ova kumua kutja ame omuñu. Okua li ve shi ovadaleluamo va Unie aveshu ova fa ovakuatua.

Omufitaongalo Nikolaus Bhengu, omuzulu, okua ile ouenda ku Noord-Amerika nde ta alukile mu Unie. Okua li onguloshi keshe ota puilikinina keengudu dovañu unene ovatiliane. „Manga ovashangi voifo va teelela ngenge ohandi holola sha shii

ku Suid-Afrika, onde va njamukula nokutja Suid-Afrika oio edu ekumuifi noli dule Noord-Amerika na England. Omesho ounjuni ta tale Suid-Afrika. Ove tu uditile olukeno. Ovañu kuinja ohava diladila fje ovañu vai.

Kaku na elumbakano lomaludi mongerka nande paife la holoka moskola.”

## EUROPA.

Omulongo navane va fja meshina lolutenda mu England.

Ovañu ve fike pomulongo navane ova fja novahapu ve dule omilongo itatu va mona oshiponga eshi eshina la ua kolutenda. Eshi la ua ko ola ja noikoto omugoji. Pakutalua kovapolisi va ti okua li li jadi unene. Oikoto ihamano oja ua ongali, ikuao ojo oje lidenga kumue. - Eshina eshi la kala ofika ovañu ova kumaidua va tuminue koshipangelo shopoushiinda nomahauto ovanaudu. Konima jeetundi dimue ovañu okua li tava kufua natango koshi jitekaukile joikoto nomilongo hejali va kuafa moku va konga. Omushingi ueshina okua fja jo.

Omaumbo omajuvi mu Parys a kungululua;

Omaumbo 2 875 mu Parys sho mu Frankryk okua tuaalelua kefundja lomulonga Marne, oshitai sha Seine. Ovañu 1575 ova ninga etomenojandjilo lefundja. Seine ova hunga ua kunguluka okudja meñofi eemila omilongo hamano. Efundja eli lidjulela ola li moilando ja kula. Ovañu vahapu ova enda koipilangi okudja momaumbo avo nokuja kedu. Ovalongi vehupifo ova hupifa ounona novakuluñu. Ovalongua ove va kuafi. - Omulonga Rhone otava hale okufulukila keefarama dopoushiinda. Ovakatolika vahapu ova kumaidua komuarta biskop ua Parys va indile vali naua.

## KINA.

Omatenda ta loko mu Tatsjen-eiland.

Oita ja uana.

Ovakomonisime ovakina ova ninga eufo jomatenda linene needila omafele avaali koñuñu ja Tatsjen. Ova longekida ojeondo jeeskepa nde tava homona elenga loita koumbangala Tsjiang Kai-sjek. - Ovakomonisime ova lua oñuñu ja Jikiangsjan, noja Pisian ova kondja najo. - Omuuiliki uehangano loshiuana mu Kina okua ti otava kuata eeñuñu kooimue na imue.

Ehangano lovakriste.

Ngashi tua tongele mOmukuetu ua November mu Evaston mu Amerika omua ongela ovapoñele veengerk adishe kakele koja Katolike jovaroma. Oshongalele osho osha tumina ne eengerki adishi novakriste aveshu elaka eli tali landula.

Oshongalele sheengerki adishe osha li ondombuedi kutja Jesus Kristus oje eteelelo lounjuni. Onge otava teelela ehupifo kekonndjo lomaludi opaife. Opo hatu ningi ekumaido tali landula.

1. Ohatu kumaida omapangelo noiuaana va tukile okupopjafana nana nova efe etondafano noubada.

2. Ohatu kumaida omapangelo noiuaana iuanife eemumbue daveshe unene momadu oluhepo.


3. Ohatu kumaida ovanandunge novauiliki veeñgundafana hadi holoka moinjanjangido va kondjife omadiladilo keshe ta etua mo a njika outondue neeñamanana.

4. Ohatu kumaida ovauiliki aveshu veengerka domomadu odo tadi kondjele okukala nekuatafano netalelefanopo di kondjele okushiivafana kuua opo oukuumue neendafano liua li kale pokati komadu.

5. Ohatu kumaida eengerki di fikife shili oiljo jado moku shiiva kuashili mounongo nomokukalela ongerki javo ovene, nokupeñdula oiljo i kale nounongo nokukala momalongelokalunga ehanganu loiuana, ova va mone omepo jopakriste ve litule mekuafu okukondjifa eeñamanana meputuko lomaludi.

6. Ohatu kumaida ovakriste veengerki adishe okukala nekuatafano limue mokuudifa ehupifo mu Jesus Kristus, oje eteelelo lounjuni nova ilikanenafane momalongelo.

7. Ngolongo ohatu ifana ne ovakriste aveshu va ilikane Kalunga Omunaeeñgono ake, ova va kuafe oiuaana nomapangelo e a edife nondjila jujukui nojombili.



Aantu jomu New Guinea osho haa tungile ngeji komiti omagumbo gauo opo ja kale megameno.

Ihe oohapu da Kalunga tadi ti ngeji: Omua oje omugameni guoje, Omua oje omuzile guoje, okoluljo luoje.

Etango itali ku tsu omutenja, nomuedi itagu ku tsu uusiku.

Omua ote ku gamene kuinaji kehe, nomuenjo guoje te gu gamene.

Omua ota gamene okupita kuoje no-kuja mo kuoje, onena naaluheluhe.

Epsalmi 121:5-8.



# O K A A N D J E T U

## OLJE TA SINDANA?

Esiku 19. 12. 54. Moshilongo shimue shomOuambo momukunda gontumba megumbo ljongandi mua tameke olugodi. Omulumentu a denge omukulukadi gue, noja hilacana omolu oshikalunga oshinene shoka hashi kondjelua oluindji kutja kashi shi ku eciua, osho iikolica. Omukulukadi a kuatua kombepo jepapuduko, nokua dimbulula kutja mokunua nomokuhanga omu noshipenga shekana ljaaluhe tashi langele aanui naahangi. Ihe omusamane okua cim-nike oluindji a hangeleue komukulukadi gue ngashi shito, omukulukadi nokua tindi nokutindilila a ti: „Omuhangi nomunui ajehe oje cike pamue manga itandi nu kandi vulu uo okuhangela aana ja Kalunga nokuja pukica Kalunga na gamene ndje moshinima shika.“ Osho ja kala ngaaka nokuhilacana omusamane ta kondjo koonkondo de adihe ngashi ta vulu, nomutondi a li e shi dimbulula kutja ngele ita kondjo shili momusamane tuu nguka a sinde epapuduko ndjoka li li momukulukadi ngo, nena ta jugua egumbo ndjoka alihe. nke a hiti momusamane nokue mu popica iihuna nuukolokoshi auhe. Esiku tuu ndjoka lja popiua petameko ljoshinjolua shika oljo lja li esiku ljologodi lua satana na Kalunga megumbo ndjoka, satana kombinga jomusamane, Kalunga kombinga jomukulukadi. Satana okua pe omusamane ondjembo noshikuni shomulilo. Ihe Kalunga okua pe omukulukadi oohapu de doka di noonkondo di vule ondjembo nomulilo. Esiku tuu 19. 12. 54 ondjembo jomusamane ja topa, ndouu, kalakaha, touu, topa. Manga ondjembo taji umbua ngeji omukulukadi okua li a tidua mo megumbo ihe omulumentu okue mu icana isheue e je megumbo omukulukadi a galuka te ja megumbo komulumentu gue ngoka e nondjembo momake ge. Omulumentu okua ti: „Ngele ito hanga egumbo otandi li fike nena, oje nokua tameke ondunda jimue. omulilo gua jaka nokuli. Aashinda je ja ja tale shoka tashi li ombua mombiga, tashi umbua nondjembo notashi fikilua megumbo ndjo. Aashiinda noja dimi ondunda egumbo lja hupu inali pja ngashi omutondi a li a diladila, nondjembo nando ja lili inapa holoka oshiponga komukulukadi nenge komusamane nenge kaanona. Osho olugodi lua satana na Kalunga lua li moondambo esiku ndjoka. Esiku lja landula ndjoka pua li pe nokuholoka ngoka ta zalekua oshishani a kale omupangeli guegumbo ndjoka ngele oKalunga nenge osatana. Ihe Kalunga, oje tuu a sindana noje a mono epangelo megumbo ndika, nando ka li e nondjembo noshikuni shomulilo mekondjo ndjoka. Oshoka esiku ndjoka lja landula omusamane okua pula omukulukadi gue a ti: „Nantango tuu ito hanga?“ Omukulukadi a ti: „Eeno, itandi hanga.“ „Sigo uunake ito hanga?“ Omukulukadi okua ti: Mu Kristus itandi hanga sigo aluhe.“ Etumbulo ndika lja ji sigo muule uomuenjo guomusamane nguka nokua dimbulula kutja nani omukulukadi ke li po auike, oshoka ejamukulo ndika kali shi ljomukulukadi, aue, oljo lja Kristus. Opo mpoka omusamane okua ti: „Ngashingeji nde shi dimbulula kutja nani Kalunga koje oku nomuenjo noonkondo e vule Kalunga kandje ngoka

## OSHIGONGI SHAAPAPUDUKI.

Osha gongala mEngela okutameka esiku 18 ongulohi sigo 20 lja Desember. Okua gongalele aapapuduki jomomagongalo ogendji gomUukuanjama. Ongundu kaji shi onene. Ja fa ando je cike 126. Mua gongalele uo aakriste ogendji kaje shi aapapuduki. Ojo ja li je niilonga jauo je ji icanenua; ngashi tatu ji uuvu pafupi komeho.

Aapapuduki mbaka ja li je nondjuulukue okupopicua koohapu da Kalunga. Ja li ja vuulua kuudigu je u na muujuni. Je u holola sho ja popicacana ngeji: „One mue ja koshigongi shomagoja?“ Ja li je ja neinekelo kutja otaa talalekua shili kOmua notaa peua oonkondo okushuna molugodi. Osho ja igidacana isheue petameko: „Ongula nga ndjono omahomato uguuda!“

Mohungi jetameko tua kundua kaasita jamue noohapu da Kalunga notua peua etalaleko tue li pumbua. Otua njanjukilua shili ohungi ndjika omolu omajambeko ogendji ga Kalunga. Ongula mosondaha - esiku 19 - potundi ontihetatu tua gongala isheue mongerki. Moandaha tua popicua komusitagongalo S. Kaukungua. Opo omuui liki guoshigongi - omuhongi E. Hynonen a tsikile otundi je. Okue tu etele omadila-

nda gama kuje. Onkee ngashingeji nanga-me ndi nokugama ku Kalunga koje ngo Tu kale ano nombili ngashi nale itandi ku ciminike ue moshinima shika aue, ojo noja paacana ombili, nokesiku tuu ndika ljokupaacana ombili megumbo ndika mua longekidilua eha ljoandaha ja li kaji mo. Omulumentu nguka shoka shi li meni lje ngashingeji inash tsejika manga kutja oje kuume kiikolica natango nenge ongiini, ihe shoka sha monika oje a dimbulula momukiintu gue kutja: Nani Kalunga ita vulu okukondjicua nando komuntu oje Onakuikotamenua kuaajehejehe. Oonkondo da Kristus hadi sindi uujuni mbuka shaa ngoka te di taamba oje ta ningi omusindani nando omukulukadi nenge okanona nokuli mu Kristus to sindana. Oku na aantu ogendji mboka ja li ja minikilua mepapuduko ndijaka enene 1952, ihe konima jokacimbo ja shuna moonkongo dauo diikolica nomihuna ajihe. Aakulukadi ogendji ja tsu oonjeka dauo momeja omolu aasamane jauo, noja shunduka shili naji mokuiiteka omuenjo nguka guo mu Kristus. Ja tila okutondelua edina ljOmua guauo, noja hogolola okugama kaalumentu jauo nokuvulika kujo nomiinima mbjoka ja paganjana nehala lja Kristus. Onkee aakuetu ne mboka mua tseja nomua koneke oonkondo da Kalunga he di pe shaa ngoka to di taamba, inamu ekelahi einekelo ljeni li nondjambi onene taji ka peua aasindani. Kalunga na hambelelue ongoka te tu pe esindano omu Kristus Jesus Omua guetu. Nangoje omukulukadi nguka ua tungicua ehokololo ndika one pamue nomusamane guoje, kondjeni ekondjo euanaua ljeitaalo dameni omuenjo gualuhe mue gu icanenua ku Kristus. Ehokololo ndika olja ningua noljoshili kali shi ljomomadiladilo. Nali tu tse omukumo mokuinekelo Kalunga.

A. K.

dilo gamue omanene ngoka a hala okulaleka nago aapapuduki sho ta ji ku Suomi. Omakota gamue gomugo tandi ga tumbula mpaka pafupi: -

1. „Ito pumbua okulimbililua okuhupicua kuoje.“

2. Itamu pumbua okulimbililua omolu ongerki ja Kristus mevi ljaauambo. Uudigu opo u li. Ekondjo tali ka kala po. Oombepo oombuinaji tadi ka kondjica ongerki. Omutondi ta kambadala okujona po ongerki ja Kristus mevi ndika ljaauambo. Ihe itatu pumbua okulimbililua, oshoka ongerki itaji humbatua komuntu.

Kombinga tua guana okutila, oshoka aapapuduki ogendji ja shuna monima. Natango otu li kokule na Jesus. Omuntu omukulu e nomuenjo. Oje e nondumbo na Jesus. Ina hala oohapu da Jesus negalikano. Onke ano eshunomonima oli li popepi. Kombinga otua guana uo okutila ongerki ja Kristus mOuambo. Oongerki odindji daaluude mu Union da shuna monima. MOuambo uo uuinaji tau pangele. Osha holoka naua mondjenda jomukuluntutumi. Omukriste e nomuenjo oje omupapuduki, omutedululi esiku kehe.

Oui ikongele tuu ecimbo ljokulesha oohapu da Kalunga nokugalikana? Oua diginine tuu ehanganoo ljooitaali miigongi nomoongundu okukundacana iinima iijapuki nokugaliikana?

3. Ongalo oja suunkundi mOuambo. Diladila ongerki taji dikua mOuambo. Olje ngo ta humbata oshimpuju shika ngele hangoje omupapuduki? - „Ino tila ngoje oshigunda oshishona, oHo a hala oku mu pa oshilongo.“ Tandi mu pe elalekokundo ndika: 1 Petr. 5:10,11.

Pehulilo tua tsu oongolo no tua galikana Omua noomuenjo da dengua pevi. Maagalikani mua zi iitja mbi: „Omua Jesus Kristus ninga omukanka guongerki jOuambo - Kavango, jaa tungilue komadiladilo gomuntu, ihe ji tungilue kombinzi joje ondjapuki.“ Amen.

Konima jelongelokalunga tua shuna mo isheue mongerki. Aapapuduki ja popicacana noohapu da Kalunga. Aagundjuka jokOndobe ja li ja longekida oondjimbo dauo noja imbi po oondjimbo hamano. Aakagumbo jomEngela naapapuduki jokOngenga ji imbi mo uo oondjimbo dauo. Omusamane S. Shitua okue tu popica uo pehulilo nokue tu talica nkene epapuduko lja pumba maakuluntu jegongalo naalongi. Ongulohi tua hulica oshigongi shetu nUulalelo Uujapuki. Osho ngeji tua jambekua shili kOmua.

Momandaha otua li tu na oshilonga oshinene shokutuma omakundilo ku Suomi. Tua fatululilua tango kutja otatu tungu „ontopa“ pokati ketu naasuomi. Omakundilo ngoka oga humbatua „mongodi.“ Ojo taji ka popja mu Suomi, ngashi naa naa tua li tatu popi. Okua li kua hijua oongundu diili nodiili ngashi aakagumbo jomEngela mboka ja longekida oondjimbo oombuanaua di tulue mongodi ndjoka. Pua li uo okangundu kaanona jomEngela naasamane Etsikilo kepanja eti 8.



# SHITLANGU.

omuna guokombanda.

Lja njolua  
ku  
Andre de Clerc  
na  
Edoardo Mondlane  
Lja lundululua  
ku  
Hosea Namupala,  
Etsikilo.

(Ino vulua okulesha embo ndika lja Shitlangu. Oli na oshindji tashi ku kuaca.)

Jamue jomaagundjuka oja li ja kala mehokololo l'ondjima ja puila mo noja dimbua omalongekido gauo. Jamue otaa kulula omafufu gauo; jamue otaa kulula omitse doojakuauo noshitezi sha tsa - otashi pula omacimbo giili nogiili okulonga oshilonga shuufuuli, okupanda omafufu. Jamue oji ikulula omashuku moka taa ka tsa omaluenja gomakondombolo. Ihe oshingene oshinenene shoka sha li sha holola sha oshe etue po ku mboka ja li ja guajeke omutse aguhe eloja etokele okuukililica omafufu noku ga ninga omatokele kashona na oja li shili ja hokiuu kaakadona ajehe. O, ope na mukali okuendaenda - naakadona jiili nojiili joshiguana. Kombinga onkuauo, ope na uujamba okuhila ehalo ljaakuaniilua aanene nokulikola esimano ljauro. Osho oshilalakanenua shaagundjuka mboka taa igandja okudana paufuli.

Ano oshiguana sha Khamban otashi kala ngaaka shi ijoolola sho shene miiguana jevi.

Omalongekido goshitisi ihaga ucilua moshigongi shika shenjanju noshuujelele. Ope nokukala egalikano ljetameko. Kehe gumue e na okujelicua. Oluindji ejapulo ohali jonuka na gumue ta kala - inaa jogoka -. Kape na nando ogumue ta vulu okudana oshituci sigo a jogua nambinzi. Ejogo ndika ohali ningua komulongi guunganga, noonkondo hadi zi kiikalunga. Oje ta daadiga omamanja gokuhunganeka nota tala nkene taga gu. Onomamanja ngaka iikalunga otaji holola nduno kutja oja gandja epitikilo oondjuhua di gandjue ondjambo naantu joshiguana ja jambekue.

Ohuginina esiku enene olja cikana.

Ongula onene manga nda koca ondu uvu endundumo, nonda jaguma olungano omaui goontunda taga zi pombanda ngashi kiikulundundu..... Meme okua pupula ndje, ondjodi noja hulu.

-Ku uvite oontunda? Ecimbo olja cikana. -

Sho tua penduka, pampango katu na okulja sha - nando okashona, ngele tashi vulika, shi vulice nokuli pomasiku galue. Meme okua guajeke oombuetelo dandje nontulo nomagadi omashona, ngoka taga adimica ndje notaga opaleke ndje nda fa oshikondjico shonale, moshija onda zala elapi etiligane tali adima, mocingo ondi na okanastuke okapu naua. Inandi opala nando onale ngeji! Ongame omuuliki, ngoka ta tungu ekuatacano pokati kootate

jonale iikalunga nenge tu tje aacici noshiguana. Ongundu onene ja Khamban taji gongala notaji imbi eimbilo ljuukumue. Oontunda tadi izizima.

Mbam - mbam - mbam - mbam - mbaa... atuhe notatu tameke:

-Ha, oshigongi! Haa! ha-a!  
Tse ja Ndzovu, ha!  
Tse aana ja Khamban  
Ompaka tua gongala  
Ku ja simana! -

Oshigongi shOshiguana. (oonote ome-mbo)

Eui ljeimbilo ndika oli nokudigininua Okufuda oku nokukala okushcna.

Nosho pua fudua, otua vululukua okacimbo, otu uvu omaizizimo goontunda tage tu icana kokuti okujapuki tu je ko. Otse notua katuka tu li ongundu ji li mumue tu uka kokuti nkoka kua fumvikua ootate jetu, mu mboka Shitlangu omunene e li omukuaniilua guetu. Aalumentu aakuluntu otaa hiki oontunda onene otse notatu cikama puujelele tu ukilila nomaui goontunda taga tendeke omakutsi, opo mpoka atuhe otui imbi.

-Ha, oshigongi!

Je a simana! -

Okelseico ndino lja hugunina lja zi kongundu, otaku landula emueno enene; oontunda otadi muena.

Omukulukadi a kulupa, omukulupe e vule aantu ajehe jomoshiguana, ota tsikile okupopica ootate aacici medina l'oshiguana.

-Otat mu kundu amuhe one ookalungana, oonakutangua noonakusimanekua!

Khamban, ongoje ngu ua li ho uilike omapenda getu mokusinda omalugodi. Makuakua, oia li ua sindi omalugodi omene kiishana jomalugodi. Matjekahomu, Mitambuti na Shitlangu, mboka tua li tue ja mono nomeho getu, mboka jetu lele noonduge no oonkondo.

Omu tu uete tua gongala mpaka, otse atuhe aana ja Khamban, otatu mu galikana mu tu silohenda.

-Katu shi aamuojje, aatekulu joje naatekulululua joje? Ombinzi joje oji li moocipa detu; edina l'ojje oljo omadina getu.

-Tu tala, otu na oluhepo tu tala, otatu sindua komavu. Oluteni ihalu hulu.

-Omoluashike ua dimbua aamuojje? Omoluashike ihoo ja lica noku ja gamena moomposi dauo, ngele aalodi aadigu taa longo iihunalonga jauo, taa dipaga aasamane, aakulukadi naanona aashona!

-Omalovu nga hatu ku jambele nago inaga opala! Otua ti ngaa tue ga hanga nuudiginini auhe!

-Omumvo nguno otatu gu piti ngiini ngele ito tu kuaca? Otatu ka njengua oku ku simaneka pamukalo guookuku. Tu tumina omvula, notatu ke ku pa iikunua, otatu ka vula uo oku ku pa omagano ga guana ogendji.-

Manga taku galikanua egalikano ndino, ajehe oja kala nokumuena, aakiintu oja tsoongolo. aalumentu oja cikama ju ukilila, uhanona umue ouala tau lili, okulila kuauo otaku kuatacana nesheketo ljuudila mboka ua kala mokuti kuootate. Oonte detango oombuanua oda adima kefo kehe ljoshimeno.



UUVU UEPUNGA.

Nda hala oku ku hokololela pafupi uuvu uumuc. Omu na uuvu uudigu ouo tuu mboka tau tameke okutana. nokutaandela uunene noonkondo pecimbo ljongashingeji maauambo. Uuvu mbuka tau penducua koombakteri dotuberkulosi nokutja koombuto duuvu uepunga. Uuvu uatjangeji u nomukuau omukuauulela.


Hatu aada uuvu uotuberkulosi molutu luomuntu akuhe, ngashika momasipa, moonngolo, moodi, mela, muuluji, moshipala nosho tuu. Ihe otuberkulosi momapunga, nokutja, uuvu uepunga ngashika tua igilila oku u tseja, ouo uudigu u vule uuvu ouindji. Uuvu uepunga ouo uuvu uukulu uonale. Ndi shi uuvu uepunga tau hepeke aantu ajehe muujuni moka.

Uuvu uotuberkulosi ouo uuvu uudigulela otatu kuata aauambo uo ojendji. Ngele omuntu ta katuua kuuvu ulue no a ningi omunkundi, nena otuberkulosi taji penduka molutu luomuntu, na oje ita vulu oku ji kandula po. Maakuluntu uuvu uepunga u li iihuepo u vule maagundjuka naanona. Oshinima shotangolela osho shika: Aagundjuka naanona je nokukotoka jaa nue iikolica. Eliko enene li vule omaliko agehe ljaantu kehe oljo uundjolouele (nokutja, okukala naua.) Uuvu uepunga tau eta oshiponga oshinene mokumana po oonkondo adihe sheke molutu nduka lua nkundipalicia tango kiikolica. Oshinima shika shi noku-dimbulukua komuntu kehe, kaagundjuka ngashika kaakuluntu jauo uo.

Oombuto duuvu di nuuzigo uado dene okujona po olutu luomuntu. Odi hoole mpoka pua tosima no hadi kala di nomuenjo no piinima iikukutu uo. Ihe ope na omatati ga kola okukondjica oombuto duuvu. Ogo omulilo, omutenja nombepo. Oombuto tadi dipagua komutenja no pecimbo efupi, nando ootundi mbali adike. Meni monduna oombuto tadi kala nomuenjo omvula netata nokuli. Mondunda jomuvu guepunga mu noombuto duuvu odindji. Omukuauu tagu taandelicia mokukolola no mokushemita kuomuvu nuuhec. Nge oje ta kolola pevi opo mpoka aanona taa dana no taa fala ominue dauo da njatekua mokana kauo. Ngashingeji oombuto duuvu odo tadi holama momalutu gaanona nokutegelela ecimbo l'jooopala ljokupenduca uuvu. Oombua noombishi noodi tadi taandelica oombuto duuvu mokulaca iijuma jokulila mo nokunuina mo. Omuvu e nokukolola nokuhijila aluhe mokakopi kiikololo no ke nokusiikilua naua. Iinkololo naji ekeluehi momulilo amuke no naji fikue po Nge oje ite shi ningi, iinkololo taji ningi iikukutu, nena ontsi noombuto duuvu tadi falua miijaha jokulila no miikulja no momeja. Ekuaco



# Oshikololo shaagundjuka.



Ehoko'olo eli tali uopa'ele oiongalele jovanjasha mefiku lefjo l'omuene ile pomai-ku taa shikula ko.

OMUENE OKUA NJUMUKA SHILI.

Ongudu jovaimbi I:

Siku ndi l'jonena, tse tu njanjukue Jesus a zj muusi, 'Sindano olje.' 'Nkandja di domutohdi Je a tokola, 'Kulilo lja guana, Sig'aluhe lja pua.

Ongudu jovaimbi II:

Ngaj'nda njanjukua shili  
Nando omukueji ondi li  
Onda mono ombili moluesindano lje.

Ongudu I: Hano efiku lotete loshivike Maria Magdalena ote uja kombila ongula inene, manga inaku sha, nde ta a ono emanja la kufua ko kombila. Ndele Maria a fikama pondje, nde ta lili ngaha a vandamena mombila. Nde a mona ovajengeli vavaali va djala oikutu itoka va kala omutumba, umue komutue, nomukuao okeemadi, apa pa nangala osimu sha Jesus Joh. 20:1, 11, 12.

Ovaengeli vavaali: Omualikadi oto lili shike? Joh. 20:13a.

Okakadona: Ova kufa mo Omuene uange, ndele ame ndi he shi apa ve mu tula? Joh. 20:13b

Ongudu I: Ndele eshi e di tja, a punguluka, nde a mona Jesus a fikama opo, nde je ina shiva nokutja oje Jesus. Joh. 20:14

Ongudu II: Omualikadi oto lili shike? Oljelje to kongo? Joh. 20:15a

Okakadona: Omuene ngenge ove ue mu kufa mo, lombuela nge apa ue mu tuala, ndi ke mu tale ko. Joh 20:15b

Ongudu II: Maria;

Okakadona: Rabbuuni;

Ongudu II: Ino kuma nge, osesi inandi londa natango ku Tate, ndelene inda kovamuatate u va lombuele: Ohandi londo ku Tate no kuho jeni, ku Kalunga kange no ku Kalunga keni. Joh. 20:17

Ongudu I: Maria Magdalena a ja nde ta hepaulile ovahongua nokutja a mona Omuene, nadi a lombuela kuje. Joh. 20:18

Eimbilo limue. Ehangano 87:1

Ongudu I: Ndele tala vavali vomuvo ove li mondjila tava i komukunda edina lao Emmaus, pe noinano itano na ivali okudja ku Jerusalem. Ndele vo ova li tava kundafana oinima aishe ei ja ningua. Nomanga tava popi nokupulafana, Jesus je muene okua ehena kuvo nde ta ende pamue navo. Ndele omesho avo okua li a pofipalekua, opo ve he mu dimbuluke. Luk. 24:13;16.

Ongudu II: Eendjovo dashike, edi tamu ende tamu kundafana, no-Omoluashike mva njik'oufije? Luk. 24:17,

Okamati I: Ove auke omunailongo mu Jerusalem no ino shiiva oinima ei ja ningua mo momafiku aa? Luk. 24:18

Ongudu II: Oshike?

Okamati II: Oinima ei ja ningua Jesus, omunasaret, ou a li omuhunganeki omunaeengono moilonga nomeendjovo koshipala sha Kalunga noshovañu aveshe. Ovapisteli ovakuluñu novapangeli vetu ñgene ve mu jandja kepangelo lokufja no ve mu valela komushijakano. Luk. 24:19,20.

Okamati I:

Nokua li tu netelameno kutja oje tuu ou kua li e nokumangulula Israel. Ndele nena eli, efiku etitatu ei aishe, eshi ja ningua. Luk. 24: 21.

Okamati II: Ndele ovakaiñu vamue va dile mufje, ove tu halukifa eshi va dja kombila ongula inene. Ndele eshi inava mona omudimba uaja, vo ove uja rde tava ti, vo ova mona emoniko lovaengeli va va tja, je oku nomuenje. Novamue vomufe ova ja ko jo kombila nde tava hange ko eshi sha hokololua kovakaiñu, ndele je inave mu mona Luk. 24. 22-24.

Ongudu II: Akutu oonaku he neendunge nje novandedeñu momitima okuitavela aishe ei ja popiua kovahunaganeki. Kristus ka li e nokuhumbata oinima ei noku ja mefimano la'e? Luk. 24: 25-26.

Ongudu I: Opo vo ove uja popepi nomukunda ou tava ji, ndele ja a ninga a fa a hala okuja kokule. Luk 24: 28.

Ovamati vavali: Kala pufje, osheshi onguloshi ei li pokuuja netango ola toka. Luk 24: 29.

Eimbilo limue

Ongudu I: Ndele eshi a kala pamue navo koshililo, okua kufa omungome nde ta hambelele, nde te u pambula nde te u va pe. Opo omesho ava a pashuka nde tave mu dimbulukua, ndele Je te va henuka. Luk. 24: 30-31.

Ovamati vavali: Omutima uetu inau pila mufje eshi a popja nafe mondjila noku tu fatululila omishangua? Luk. 24: 32.

Eimbilo limue.

Ongundu I: Nomefimto tuu olo vo ova fikama nde tava shuna ku Jerusalem nde tava hange ko venja omulongo na umue na ava va li pamue navo.

Ovamati vavali: OMUENE OKUA NJUMUKA SHILI;

Aveshe: OMUENE OKUA NJUMUKA SHILI;

Ongundu jovaimbi I: Jesus, Omuua guandje Je a jumuka, Mukulili ngu guaroje Je a sindana! Ngame uo omuandjo ndaa nepangulo. Shaa te kala muje, ndi nemangululo,

Ongundu II: Ngaj'nda njanjuka shii..., (Nuuve Haleluja 309).



INAANDI HALA UE.

Komuhongi kue ja esiku limue okanona okapagani. Oka ulukilua efano lja Jesus momushigakano. Okanona sho ka pula, efano shoka tali ti, oka fatululilua, Jesus nkene a si omolu uuinaji uako uo, nando oje muene okua longo shoka oshiuanaua ashike. Okanona sho ke shi uvu, oka taalele pevi no ka ti nokulila: „Ngame inaandi hala ue okulonga shoka oshiuinaji nando esiku limue. Nda hala okuopalela ngu a sile ndje.“

UUCONDOLO.

Omugundjuka ngoje, pukuluka. Muujuni auhe ngokaiijoolola moshiguana shauo oje ta talua egoja l'jotangotango. „Penduka ngoje ngu to koca ngu jumuke kuusi, Kristus note ku minikile.“

Andreas Saanika.



# AALESHI TAA NJOLA

KU C. D. M. NORTH COMPOUND.

OHOLOMENDE jaudafana no vapangeli va Wanbo okutuma Oma'enguena ku C D M okukalungamena pokati ko I umbu no valaule. Hano kashu epangelo latuma ngaha: AANTU OMUKUANIILWA ua Ndonga S J E Karbonde okuatuma ovatumua ava-vafikana momafiku ane ohani Febulwali 1955. A. Muifi. J. Nekongo. S. Kauluma. Omukuaniil wa Muala wa Ukua-luthi atuma Simon Amutenja, Ukuambi D. Shilongo Omukuaniilwa ua Ngandjela atuma S. Jona no mokati komuedi Feb. Epangelo la Oukuanjama la tuma R. Kautuima, F. Nghanua, W. Hashali. Hano tuli natango meteeleri la vakuetu vamue vane taveja na umue uavo ouokuninga H. Kamu u no vakua inatuvashiva natango. Hano atushu ava tuafika naua mu C D M, mo luendo lo pombanda. Ashike fie Ovandonge otuafikamene mefiku lii un na ko dita shashi okuali lijadi oilemo urene hano odila jakala nokuningina moie no noku nbaduk - mo, nedu letukana lahupu pokuhanga o Windhoek Ompepo umue ouakala nokuli uamuena itaulongo. Hano okuali tuna okuwila mo Windhoek ipang lue. manga Okatimbo kanini esi japua otualonda vali ndele nokudja opo otuaenda naua fijo omo Lange. Ovatumua ava aveshu ovaongala mo North Compound okuliki ua oilonga ilii na itili. Ovo ovajakulua naua unene ok Vahona va C D M. noveli muteku muwa unena. Okutukundu ovaleshi vo MUKUETU ne Epsalm Dav.d 5:1-4.

Alfred Muifi.

## OHSIGONGI . . . . .

ojendji ja zi koombinga noombinga. Ajehe mbaka ja longekida sha okutula mongodi. Ohungi jetu jotango ajihe ja tulua mo nokuli nsho tuu oondjimbo odindji nomauuico gamue gaapapuduki mosondaha komatango. Omusitagungalo V. Kaulinge a tumu omakundilo omauanaua peha ljaakriste ajehe aauambo. Omulongi Liina Mpanda a tumu uo peha ljaagundjuka aauambo. Opuu li iinima ojindji iuanaua, ihe itatu mana oku ji njola. Otua li tua njanjukua shili sho konima ajehe ja peuampito okupulakena mauu gauo noondji mbo dauo ngashi naa naa ja popi nenge ji imbi. Otua li tua kumua noonkondo notua pulacana ngeji: Sho omuntu ta vulu okutungu ongodi jatjangeji taji taamba oohapu nomauu gaantu. Ongiini Kalunga ngoka a shiti omuntu! Oje ta kuata oshitja KEHE Mat. 12:36, nomadiladilo agehe.

Mumbika ajihe Kalunga muene okue tu popica moshigongi shetu nokue tu pe shoka tue shi juulukua - „Omuenjo gua njajika oguo ondjambo ja hokiua ku Kalunga-“ Ps. 51:19. Aapapuduki aahoolike! „Inamu ekelahi einekelo ljeni li nondjambi onene.“

L. Mpanda,  
Ondobe.

OU DU UOKOMUENJO.

Ope na ovakriste vahapu ve na oudu uokomuenjo. Noudu ou oua ninga meemuenjo davo oipute ja kula. Ombili jokomuenjo ja kana shashi eemuenjo davo da njanjaulua koulunde. Eui lokomuenjo halakala nokukonkola alushe, onke ombili ja shili ja kana mo nuntu ou.

Omukuetu, kape na vali omuhakuli umue mounjuni ou e shi kuhakula oipute jokomuenjo. Omueene Jesus oje aeke e na omuti muua, ou tau dulu okudimapo amatimba omuntu nomuti ou ouo ohonde jaje. Omueene ota ti: „Ame ou hai dimipo amatimba oje omo'uang muene, ame no itandi a dimbu ukua vali.“ Omunelao oje ou amatimba aje a dimuapo.

Abed Nehemia.

## EJELETUMBULO.

Omukulu guonale okua ti: „Okapundja itaka tsu ongombe; osho uo omumati ha kala pombala nando na adike koongundu daamati ojentji, itadi mu sindi.“

Omumati a tja ngeji oje oku nuufule oshoka okua zililua komuene gue, onke ke nuumbanda uasha. Osho uo, omukriste ngoka e na Kristus eliko lje, oje okua guana a pua. Satana nando ne mu ade noongundu daakuiita je, ote mu tila oshoka oje okua zala omatati guujuuki, ogo tuu eitaalo. Ongoje ependa mushike omukuetu, ependa okukondjela egulu, nenge ependa ljokukondjela oheli? 2 Pet. 1: 3-11.

Sebuloni Elago

## UUVU . . . . .

enene oljo okukolola aluhe mokandoha ka siikilua naua no mu na omuti. Omuvu a kale e na oshijaha shiili shokulila mo nombekele jiili jokunuina mo. Omuvu e nokulala oje auike mondunda je. Okujanda omukuau guuvu uepunga okuo nkuka: okutula aantu ajehe mboka taa kolola nuuheci. Ihe aavu mboka je noondunge okukelela uuvu uauo uaa kuate jalue, itatu pumbua oku ja tila.

Uuvu tau tameke ngini ano molutu luomuntu? Oshinima shotangolela osho shika: omuntu kee li naua ue. Nge tatu longo noonkondo, tatu vuulua, ihe nge tatu vululukua naua tua koca, uusiku tua mono oonkondo oompe. Ihe omuvu guepunga hasho shoka. Oje u uuvite oovulue aluhe. Oje ta tameke okupupjala kashona kouala iivike jimue noomuedi dimue nomiti itadi kuaca sha, na oje ta pushu uusiku. Oje ina hala okulja ngashika shito e ta ameke okunanga. Oje u uuvite uehame moongolo de na ota tsua montulo je. Omuntu e na ngika omukolo uo, na esiku limue oje a mono ombinzi miinkololo je. Ngashingeji uuvu ua tameke okugeja noonkondo.

U nokupanga ngiini omuvu guepunga ano? Kamu na omiti di shi okukuaca. Oshimpuju shoje osho okujelekela okukuaca

OMUMVO HO GU OPALEKICA UUANAU UOJE NOSHINKOTI SHOJE HASHI TONDOKIC' OMAGADI Ps.65:12

Ngele tatu diladila uuanaua auhe mboka Kalunga e u tu ningile momumvo nguka gua ji 1954 nena itatu uapa oku u tumbula. Ngele tatu diladila omasiku getu gonaale sigo ongashingeji, nena ondi shi shi otu nokuhempulula nokutja ngeji: Otse otua mono ko nkene Kalunga a jelucile esilohenda lje nuuanaua ue auhe kombanda jetu esiku kehe momumvo nguka gua piti. Ohoole je nontalanteni ja kala onene jaa na nando oongamba, nando oluindji tua puka mondjila je no inatu vulika kehalo lje ejapuki, natango tuu oje ina vulua oku tu jakula.

Momumvo nguka omupe omupsalmi ote tu dimbuluca natango kutja; Kalunga oje tuu ta gandja uuanaua, oje nge e li putse, nena omumvo uo tagu kala gua jambekua nomajambeko ogendji, oshinkoti sha Kalunga hashi tondokica omagadi momumvo ote gu opalekica uuanaua ue.

Kalunga a hala okuninga omumvo nguka omumvo gueligolo kungoje noku ngame omolua Kristus nguka e ja oku tu manguulala e tu pe enjanju ljokomuenjo esiku kehe momumvo nguka omupe.

Ngashika Kalunga a kala nale sigo onena pamauvaneko ge, osho ta kala uo omasiku agehe momumvo nguka. Otu na Kalunga te tu kumica nuuanaua ue. Oje e na sha momumvo nguka e shi tu pungulila, shaa tuu tatu mu landula moshinkoti she tatu mono uuanaua ouindji noje te tu cikica kegumbo ljaaluhe. Oje ta ti: „Ongame tandi pitica uuanaua uandje pu ngoje esiku kehe.“

Osho ngeji Kalunga a hala oku tu jambeka nomajambeko ogendji gokomuenjo no gokolotu uo momumvo nguka omupe, Oje na hambelelu aluheluhe.

T. S. J. Namuhuja

omuvu a mone uukolele. Omuntu ngele ta li naua ta kondjica uuvu mbuka. Omuvu e nokulala mombete nokupeua ombepo ontalala uunene nokutja a mone naua ombepo ja guana. Omuvu okua indikua okulala peha mpoka etango tali tsu uunene. Olutu nalu kale lua jogoka, iihuepo esiku kehe te lu pjana uo nelapi lja tutikua nomeja omatalala.

Nohuginina inekela Kalunga. Oje auike ta vulu okukuaca aluhe.

Aakuetu aahoolike! Tate Kalunga okue tu pa oondunge okujoolola iinima iuinaji niuanaua. Didilika ano naua, sho e ku pe omapukululo ge ogendji, ihe ongoje ino hala oku ga taamba, ano mpoka ngele tatu aadika kiiponga, oondjo odetu jene, oshoka otua lombuelua oluindji.

Ookuume aahoolike! Epukululo ndika natango tuu nali tu pe oondunge. Tu kotokeni ano, opo tu kale naua komalutu getu.

Lja zi mEjelicilo ljuundjolouele